

本朝分省人物考

人物考卷之七十一目錄

福建泉州府二

陳亦言

莊逢辰

趙士亨

龔炯

陳章應

張忠

王彥英

蔣疇

余福

朱則文

黃維清

夏秦

朱鐸

陳道曾

陳安

趙應

李思鄒

崔惠

葉秉乾

莊敏

朱鑑

李珙

蔡清

顧珀

畱志淑

楊智

李聰

傅浚

黃瑗

張岳

陳琛

史朝賓

黃傑

林性之

鄭懋中

張廷芳

趙復

王慎中

蘇士潤

周天佐

楊逢春

蔡貴易

郭楠

丘養浩

李源

蘇志仁

詹寅

陳讓

黃馴

詹仰庇

蕭騰鳳

李廷機

補遺

謝璉

陳道基

蘇濬

楊道賓

本朝京省人物考卷之七十一

福建泉州府

陳亦言

陳亦言字汝納晉江人至正間由古田侍父瓊來官  
晉江汭州鹽場因家焉平生不樂仕進刻苦力學貫  
穿經傳子史尤工詩賦同時蕭子玉趙應嘉張仕寬  
邵右田輩常相往還講論吟咏年幾八十卒有潛齋  
集

莊逢辰

莊逢辰字士明生於元季躬勤種藝以奉母雖在亂

手未嘗釋卷母卒喪葬一據考亭家禮國家統  
一寰宇或勸其出仕辭曰嚮遭亂離首領且不保今  
幸際太平足矣敢鬻榮進乎日惟教子讀書鄉後進  
多師事之稱靜齋先生後以子琛恩贈大理評事

### 趙士亨

趙士亨字應嘉晉江人試吏于縣未幾棄去杜門讀  
書移家九峯山父蚤喪明母復風癱而奉養極其甘  
旨湯藥必親累歲不少解父母卒喪葬盡禮廬墓以  
終制時山寇呂光甫等嘯聚剽掠村落焚民廬舍每  
相戒勿犯其居後教授于鄉洪武初以人材授繁昌

窪河泊官以告歸卒于家

龔 炯

龔炯字延璋晉江人敦厚周慎刻志爲學詩文爲當時所稱書翰遒勁端嚴得歐陽率更筆意洪武中應薦以二親年高上疏乞歸終養卒于家

陳章應

陳章應晉江人洪武中進士初授榆次縣丞調安丘藩憲考其學優廉幹以狀聞特降旌榜嘉之仕至禮部主事卒于官其孫道曾性資朴茂邃于易舉進士改庶吉士自陳願授學職三歷廣文所至以師道自



任云

張忠

張忠晉江人永樂壬寅由太學生擢監察御史有能聲陞廣東按察司僉事累平賊寇以靖地方致仕卒

王彥英

王彥英晉江人永樂中舉進士擢行人持已端謹陞吏部員外郎能聲著聞尋遷山西布政司左叅議卒于官

蔣疇

蔣疇南安人永樂中進士任監察御史貞度肅僚凜

有風采所按屬貪墨吏先拔家而去其審覆多所平反士類以大用期之無何丁母憂而卒

余福

余福惠安人永樂中進士授行人使交趾宣達有體夷人悅服以金銀器用贈峻拒不受文廟廉知之深加嘆獎未幾巡北京剛直積忤當道出知撫州府再左遷太平府同知福爲人短小兩目炯然遇事慷慨不爲利害趨避卒與世齟齬不至大用云

朱則文

朱則文諱虎晉江人幼失怙恃鞠於伯父德善遭元

末兵亂欲殺德善以取材則文起抱號泣求以身代  
兵感其義遂兩釋之洪武間夢神告曰天錫金助汝  
不給已而果獲金數十錠不以營貲產悉濟貧乏後  
以子鑑 恩贈右副都御史

黃維清

黃維清字源潔晉江人弱冠領洪武甲子鄉薦明年  
登進士第歷職郎署以才諳聞陞九江知府特 賜  
勅以往九江土瘠民漓號稱難治維清廉勤平恕漸  
著治蹟卒于官

夏 秦

夏秦字西仲晉江人少讀書凡經傳子史靡不周覽  
教授鄉里郡守胡器與部使者多造其廬咨以政治  
洪武十八年召試京師欲任用之自陳年老乞骸骨  
歸簞瓢屢空晏然以終老年九十六卒

朱鐸

朱鐸字允學晉江人七歲能對偶十歲能詩語皆超  
絕弱冠第永樂丙戌進士授官戶部主事性簡亢寡  
合退而家居以經史自娛請文者戶踵常接得之者  
以爲榮郡中石刻多出其手卒年九十有文集藏于  
其家

陳道曾

陳道曾字端誠晉江人章應之孫性資朴茂遂於易  
旁及諸經子史發爲文章詞義精到制行卓然不苟  
徇流俗第永樂戊戌進士改戶科庶吉士自陳願受  
學職授吳縣教諭陞瑞州府教授遷無爲州學正所  
至以師道自重爲湖廣浙江山西考試官俱以公明  
稱卒于官所著有吳下集筠陽濡湏等藁

陳安

陳安字克成晉江人第永樂辛卯進士授工部營繕  
司主事以才行聞陞衡州知府爲政清簡屬歲饑安

不待報開倉賑恤尋丁內艱服闋改重慶府後患足疾民苦遮畱之扶曳而治者幾二載竟以老疾辭歸卒年八十

趙應

趙應字孟剔晉江人弱冠入邑庠以註誤謫爲吏宣德間授南昌典史當道者薦其才擢知浮梁縣政教浹於士民威令行於狡猾縣東南有青峯渡灘水悍急歲恒一覆舟溺者甚衆應具牲醴爲文祭之自是患息滿九載民相率乞畱陞六品秩仍知縣事再滿秩丁內艱服除疏乞致仕年八十四而卒

李思鄒

李思鄒晉江人有勇力頗讀書知大義正統十四年沙尤鄧茂七作亂黨酋吳四官據黃山人皆望風奔投脅思鄒往思鄒正色叱之曰我太平百姓豈從汝輩爲盜耶遂以義倡鄉里從者三百餘人立柵爲禦備屢與賊戰俱勝一日早適大霧晦冥咫尺不辨賊乘間襲其柵衆倉卒奔潰思鄒獨率六七人當柵門力戰爲賊所殺暨斂顏色如生人皆異之

崔惠

崔惠字迪吉晉江人宋進士拱之後天性純篤學問

淹貫由鄉貢士任江西石城縣教諭正統戊辰叛賊陳椿陷石城執惠逼令從已惠罵賊不釋口驅迫行里許會賊燬草營遂投火自焚而死

葉秉乾

葉秉乾同安人慷慨尚義正統辛巳歲饑出稻二千石入官儲以賑貧民歲已巳沙尤寇發延及諸邑秉乾倡義率民兵屢戰不利被擒賊脅其從已罵曰吾奉義討賊不幸力屈速殺爲幸豈從汝反耶賊猶不忍殺論之數四不屈而死成化初御史涂棐奏旌其門曰忠義



莊敏

莊敏晉江人正統中進士任吏科給事中骨鯁立朝  
論諫務存大體後出守雷州威儀嚴重喜怒不形人  
不見其有爲而事無不治云

朱鑑

朱鑑字用明晉江縣人由乙榜舉人授教諭秩滿擢  
監察御史巡按湖廣名聞於朝畱三載始代歸其巡  
按廣東奉命讞獄全活者衆招撫逋叛恩威並著用  
薦陞山西左叅政使未幾以北虜入寇陞右副都御  
史巡撫山西提督雁門等關凡處置大小事悉得其

宜正統己巳聞京師戒嚴築城浚池練兵收馬爲備  
禦計韃賊入界時夜雪士卒難之鑑曰此李愬入蔡  
時也一鼓俘之人謂西北鎖鑰乞歸不允召還叅佐  
院事再乞休致許之家居二十七年卒年八十八賜  
祭葬如例錄孫輜爲太學生鑑公廉謹恪見事明敏  
片言之間是非曲直立斷所至吏畏而民懷嘗上書  
言十數事皆國家大計賜詔褒之閩士通顯以政事  
稱者鑑其一云

李珙

李珙字廷璧南安人由胄監除知蕭山縣縣俗生女

多不舉珙立法禁之其俗稍革蒞官廉勤公慎邑民  
安之景泰元年以父喪去任民遮道悲泣服闋改懷  
集縣後乞休致年八十四卒

蔡清

蔡清字介夫晉江縣人成化甲辰進士授禮部主事  
弘治三年改吏部稽勳司六年陞驗封司員外郎養  
病尋起禮部郎中十三年因彗見疏時政以弭天變  
言中官李廣尚在朝班惟是紀綱廢弛故士風日壞  
甚至宦官廝養宅舍擬公侯金銀動萬計而錙銖取  
民者多充債將之家轉運權倖之門民力訕兵力弱

尙忍言哉今欲抹之必先正心用人下部知之尋陞  
江西提學副使正德初忤寧藩欲傾之遂致仕正德  
三年十二月起南京國子監祭酒未至卒生平飭躬  
砥行不入俗浮靡好學至老不倦以六經爲正宗四  
書爲嫡傳以周程張朱爲真派研精殫力摹擬闡解  
學者宗之曰虛齋說也在江西務端士習正文體嘗  
曰學宜養正性持正行聖賢言語熟復玩味則舊去  
新來日改而月化天性孝友內外親族貧無衣食及  
不能葬者皆收恤之家雖屢空恒借貸以自給而公  
弗之計也其學術德器爲一時名儒云

顧 珀

顧珀字載祥晉江人童時卽善偶對稍長刻苦力學弘治乙卯領鄉薦己未舉進士除知虹縣有惠政丁父憂正德丙寅起復補旌德察民瘼擇所宜利者行之於訟獄立爲剖白每化以情鄰邑有淹繫數年不決者咸來求質尤勤積貯值闔郡歲饑獨旌民得免孳移爭樹碑頌德擢守和州復罹大饑倒倉庫所蓄賑之不俟申報巡按捧部檄督逋賦甚亟珀計民貧無措召富商諭以大義商各輸所有貸官至秋成還之商民俱無累州有蘆課勢家侵佃相仍查收買者

給批輸限無敢違者以治行擢南京考功郎中丁母憂服闋改除庫部諸司薪隸舊以衙門大小有軒輊珀革積蠹一例分給人無間言收倉廩俸米除斛面杜侵盜納戶稱便京衛勾解多影射爲奸珀於清勾冊內弔戶部月支冊查對積猾不敢欺隱軍士有功陞職官原籍多解丁補伍珀請行印綬監查黃是實將戶丁發回原籍當差軍充重役陞湖廣布政司叅議督儲各府起運錢糧及王府祿米衛所糧餉節年負額幾倍珀設法綜會賦以不虧屯田瀕江以堤岸圯壞不修捐屯額查累年拖欠軍士月糧每石折銀

三錢令軍士砌石一丈者給銀六錢不加賦而堤岸  
悉報完行部至斬有妖僧詐稱奉 勅往名山掛旛  
所在恣橫珀密發其奸置之法已卯寧庶人反南昌  
珀駐黃梅扼險爲池皖援會 武廟親征人爭逃竄  
珀榜諭安輯地方特以無恐事平乞休 世宗入承  
大統以護送 聖母勞有金幣之賜復上疏乞休奉  
旨准致仕薦剡歲聞至嘉靖五年起四川按察司副  
使整飭威茂二州珀至修理城堡墩臺關口召募武  
勇彈壓羌夷歷年賞番虛糜歲計五萬餘兩一一核  
實餘銀幾萬兩廣募民鑿石坎開大衢便商往來吐

番來貢挾利器珀創會館差官把守令夷人釋刀易馬乃入郭民免毒擾後守爲定規踰年陞河南右叅政又明年陞江西左布政使值賓興廷差京官主考珀職提調嚴關防去取悉裁自內廉人稱得體時朝廷有龍虎山之役珀不忍派民因查庫藏見三巨桶封識朽敝簿籍不載啓視之爲金遂申撫按以此銀署工程餘作歲例差官解部是秋擢南京太僕寺卿檢舊牘振舉馬政見近郊腴田荒蕪問之係屯田以官徵上手拖欠故不敢耕珀令軍民人等開墾成田之後照畝徵糧以足屯額不失已丑陞南京太常寺



卿尋陞南京戶部右侍郎珥署篆疏上便宜十二事  
畱心度支京廩充溢攝憲部攝都臺兼督江防俱勤  
慎不懈及見各衛所屯田久拋荒不耕仍比徵屯糧  
乃與屯田御史疏請除豁畝數追徵則例遵守至今  
在部五年致仕卒年八十六祀鄉賢

畱志淑

畱志淑字克全號朋山永春人十六遊蔡虛齋之門  
一見稱其遠器十八卅角以儒士領弘治戊午鄉薦  
登乙丑進士授溫州府推官三年爲刑部主事遷員  
外郎郎中守杭州杭當要衝征人使客終絡交道有

司濫取曲承以希延譽鎮守織船中官相繼漁獵數十爪牙旁午入郡如虎狼淑一切裁正或寘之法鎮守恚欲乘相見倨挫淑簡執不爲屈已卯代鎮爲畢真逆濠黨也至自江西聲勢翕赫擁從牙士五百餘人肆行殘賊人人自危淑密得其不可測之狀白臺察監司陰制之未幾真果構市人一夕火其居延燒二千餘家淑恐其因衆以爲亂閉門不出止傳報諸衙門人毋救火餘數日果與濠通變真將發應濠臺察監司召淑定計先提民兵伏真門外監司以常禮見出淑入真怒曰知府以我反乎應曰府中役從太

多是以公心跡不白因令左右出報監司旣入卽自  
堂上執真手與語當自白之狀衆共語遣所不藉之  
人以釋衆疑真倉卒不得已呼其衆出出則民兵盡  
執而置之獄俄與真入視府中見所藏諸兵器詰曰  
此將何爲也真不能答乃羈留之踰月上得奏狀繫  
真入京伏誅其有膽略知慮動合機宜類此時濠變  
方起人情詢詢以爲必取水道及南京 武廟親率  
師討之憲臣以徽爲襟喉地行在供億胥此焉辦乃  
便宜表淑知徽州報至卽出篆簿帑藏餘八千金人  
始知真清白吏也至徽止預接駕丁夫餘悉如故公

私宴然去杭踰年人思淑白當道復之臺察以聞竟  
從杭請未幾遷湖廣按察司副使尋轉布政司叅政  
銅盤嶺洞賊起淑捕之先廉獲土民爲藏匿若干人  
凡報賊者輒弗令返絲是消息不通乃令各村富民  
集兵以待麾指運用莫測分道直迫賊壘而猶不知  
月餘外給不繼賊始困又使人善諭之遂降乃下令  
官兵任取金帛籍餘資于官者數萬功上受賞會大  
饑多方講求事宜置斂散法極貧賑米次賑錢次轉  
貸節役蠲稅民多賴焉屬有腴田數百頃水決爲陂  
塘歲比不登淑白臺察出所籍銅盤洞金以資費度

勢而疏導之爲斜堤植柳以遏水勢不二年田有秋  
以丁父憂服闋轉浙江按察使又丁祖憂服闋報補  
江西按察使轉浙江右布政使疾作卒年五十二事  
繼母胡克孝與其弟志及志憲怡然友愛凡先人所  
遺悉以推與志及挈其子元復輩扶柩江西藩臬諸  
司賻奠數百金悉辭不受

楊智

楊智晉江人幼有大志成化初舉進士擢南京監察  
御史因天變陳言歷數大臣之罪當黜者且及宮闈  
近幸遂賈衆怒繫詔獄將寘重刑尋以科道交章辨

釋黜廣西布政司照磨轉化州知州卒智歷仕未久其志節已卓然可稱一斥不復竟死炎荒識者莫不悼之

李聰

李聰晉江人弘治庚戌進士授翰林院檢討充雍府長史改吉府聰自爲舉子時經術行義已爲士類所稱及輔藩王以剛正舉其職事正德初疏乞歸養家居杜門動遵矩度鄉士人敬重之稱曰古李先生

傅浚

傅浚南安人弘治中進士授主事丁父憂遭逆瑾密

法除名後瑾敗起工部員外進郎中敭歷中外以績著

黃瑗

黃瑗晉江人弘治中進士知長山縣時山東旱蝗瑗多方拯濟隣境饑民間之來就食者以萬計累陞肇慶府知府以平賊功進三品秩焉

張岳

張岳福建惠安人初以進士授行人率同官諫毅皇帝南巡杖闕下謫官嘉靖初復職累擢廣西浙江提督撫治勛陽總督兩廣召改刑部尋進右都會

鎮守同仁諸苗叛詔以岳視湖廣川貴師岳度苗情  
謂撫守非計乃大集土漢兵檄請將分道進剿斬獲  
以數千計會有思州之敗詔奪一官未幾盡勦首惡  
龍許保等功未報而岳卒其後兵部覆上其功復右  
都御史贈太子少保謚襄惠賜祭葬如例

陳琛

陳琛字思獻號紫峯泉州人正德丁丑進士始授刑  
部主事乞爲南京戶部以便養轉南京吏部考功請  
告家居就家起爲貴州按察僉事調江西僉事皆督  
學政並辭不赴蔡虛齋之學方顯士人鮮能習其傳



而琛之生稍後自以其意爲宋儒文公朱氏之學未嘗聞虛齋之說也一日虛齋得其文於故長史李木齋所嗟異久之李曰此吾徒也虛齋瞿然曰吾乃得此人爲友足矣不敢爲之師也於是乃介李稟學於虛齋虛齋曰吾所爲發憤沉潛辛苦而僅得者以語人常不解不意子皆已自得之今且盡以付子矣於是講爲師弟子琛之書布於四方家而有之學者治經求通于朱氏微先生之書若瞽者失相從禽無虞悵悵然不知所如往士之專精自名所業以授生徒者往往爲書其卑者望先生之外藩而不見其門其

高者不能以有加也故其爲書矜名立號何啻千百  
皆滅沒蔽塞小行而不廣暫誦而輒廢惟琛之書焯  
乎昭布大行而久存雖與世相弊可也今書肆所板  
四書淺說易經通典是也

### 史朝賓

史朝賓字應之號觀吾晉江人嘉靖丁未進士當  
肅皇帝癸丑春楊椒山繼盛以兵部郎上疏極言相  
嚴嵩納賂蠹國十事疏中有引二王語 上大怒命  
杖之百下司寇獄舉朝皇皇時朝賓以員外郎署司  
事部堂何問當擬何律朝賓答以奏事不以實當用

此律何曰更有一律可用汝試尋之次日復曰以員外見只有此律他無可傳者何乃指詐傳王旨一條謂用此何如朝賓爭不可時急矣延數日獄未上何乃曰汝執誠是然 聖怒不測與其俱斃無益不若姑徇 上意以待後解左堂王嚴氏姻人曰司官欲徇名姑饒我老命於是改擬詐傳王旨絞藁成授司令署銜朝賓痛憤既不可奈何乃自署本末云楊某言雖誑誤心實無他惟望 陛下憫其狂愚謫發遠戍以全好生之德數語及疏人嵩怒楊坐死司官降三級調外任由泰州判官陞楊州府通判陞南京戶

部員外尋陞郎中母憂服闋補工部郎中管張秋陞  
河南僉事陞尚寶少卿陞南大理寺丞應天府丞南  
鴻臚寺卿時文貞爲元輔方欲大用未幾卒祀鄉賢  
祠雅尚澹泊簡約恥爲時俗麗態自宦所歸儼居僧  
寺舍車而徒宛然寒素孝友忠信不言而躬行居官  
奉法循理節冗費恤民隱卻餽遺雪冤抑所至著績  
薦於端簡鄭曉曰表裏無間夷險一節稱於蔡巡撫  
汝楠林宗伯濂曰不飲大梁一滴水曰聽其言若訥  
訥不出口而胸中膽略有萬夫莫當之勇嘗集自古  
父子兄弟言行可法者爲史氏內範行于家

黃傑

黃傑字一貞號忍江同安人以貢爲湖廣麻城訓導教兼父師恩義並篤嘗謂諸士子曰吾初授官時每念之不寐竊謂官以訓導名豈漫然哉字從言從川欲吾諄諄以善言與諸生相切劘也導從首從之從寸又欲首躬行以倡諸生隨其所之尺寸不可踰也居嘗分俸以贍貧士又嘗述宓子之治單父每抑競崇恬蓋感楊喬之喻云而又時時稱引其鄉先正若虛齋之操履次崖之風節淨峯之長厚其行事甚詳竟口無一庸俗譚也秩滿陞海寧教諭海寧士佩其

德建祠生祀之後以教授歸楚耿天臺周元孝皆所  
薦愛士也元孝督閩學政謁其廬猶儼然以師道臨  
之更不一語及私天臺曰覩里中諸寒士擔簦徒跣  
爲俯仰計良苦也歲時以無能修儀爲楚或稱貸以  
往候之署閤人預探有贄方報見見則盛容怒氣臨  
之已納贄袖中默以指度腆菲稍如意始降色相遇  
否則設諸難督過士逡巡不敢吐一語至貴豪子弟  
則又謔浪媒褻無復夷等聞黃先生之風宜媿死矣

### 林性之

林性之字師吾號一川晉江人自少受書於父峽學

既有所受而精之以思多所自得其所說易中庸時  
義自爲庠生時諸經生則已遵信之如前輩人所居  
教授常數十人僉事蕭請以爲士師賓禮之僉事有  
所屬吏以贓敗因私於性曰君脫我我厚謝君性曰  
某書生耳知爲師授弟子經他非所敢聞也其人愧  
謝去嘉靖元年舉於鄉八年舉進士授浙江麗水縣  
知縣三年擢南京戶部山西司主事監龍江天策諸  
衛倉丁父憂服除改戶部浙江司主事爲尚書梁材  
所知委監龍慶古北口倉三年遷貴州司員外郎監  
天津倉以病乞改南京遂遷南京戶部廣西司郎中

過家病卒年五十二爲人恂悞質訥蕙蕙細謹世俗  
一切鉤距機警鑿空籠罩之巧非特恥而不爲亦若  
性必不可移而爲之然者其始令麗水邑故有密課  
後密戶以課重徙盡則均其課於病密之不爲密者  
至性疏除其額凡若干會造籍時里中以竄絕自言  
者三十餘戶吏以爲無故減三十餘戶且得罪性竟  
減之守令本以盈課額多戶口爲功最而性之爲令  
益如此律令倉法最重坐者往往累死而老倉曹方  
收粟時貪升斗之賄不擇美惡乾濕歲久浥爛輒繫  
死不能賂死則連繫其妻子坐監龍江倉時欸欸戒



語其屬曰奈何以升斗故坐重法乎頃之適有浥爛坐罪者性輒愀然遂命發數倉粟與其浥爛者均給於軍曰此一軍所虧粟粒耳于是諸屬感泣至不忍犯法其在龍慶以爲商賈邊儲所本商賈病則粟不來粟不來則邊人坐困故一切條去其所不便高其價以招之自是粟溢於廩而性得時其出納以濟邊人之急至在天津時值倉粟空又寒凍餉道阻軍無所食卽奏請發旁近德州倉粟給天津軍三月食或謂于法不得相借不爲止已而朝廷竟從性議當是時微性一軍幾詢詢性本細謹畏事爲戶部慎出納

守尺寸法不敢失至其越法有所移用如天津時事而曲法有所寬貸如龍江倉時事抑何毅也卒祀鄉賢祠

鄭懋中

鄭懋中字辭以晉江人由郡庠陞太學領應天府丙子鄉薦擢知程鄉縣治先禮義不尚法律民謠之曰鄭懋中真長者禁令不煩徭役寡斯民相見何嬉嬉昔日無羊今有馬初程鄉民鮮知學懋中至首作新學校親爲生徒講解自是始有進士登第者一日感疾戒其子具湯沐正衣冠端坐而逝民哀慕之共昇

其喪歸葬復立像於漢令曾芳之祠而合祀焉

### 張廷芳

張廷芳晉江人世居縣南之方山父謙齋以文學召爲石井書院司糾廷芳世其業以講明理學爲務冠婚喪祭一遵朱子家禮自號退密翁嘗著易經十翼章圖蘊義十卷未上卒于家退

### 趙復

趙復字無疾號退翁晉江人隱邑之孤山博通經史不求仕進泉俗冠婚之禮率弊於侈靡喪葬之禮多壞於浮屠復惓惓以古禮爲之倡人多化之卒年九

十五門人號曰莊簡先生

王慎中

王慎中字道思別號遵巖其祖由固始徙居晉江慎中生有奇質母教以詩輒記誦不忘父教以對語應答如響年十三四盡通舉子業且多讀古人書時授學於蔡虛齋高第易時中一見謂當避生三舍年十八舉嘉靖丙戌進士授戶部主事監兌通州往監兌者惟取完事不復及國家大計慎中獨急轉輸革侵耗宿弊爲之一清暇則讀五經暨百家言詩文具泰漢魏晉風骨又倣晉人作書遂擅臨池未幾改禮曹

更得一意于文事 世廟方重祀典文制禮作樂西郊改建百役奔馳慎中時典祠祭督工考禮克副尙書之托辛卯主廣東鄉試錄文甚佳明年狀元及第者卽鄉魁林大欽也朝議破格用人將取部屬充館職諸部屬無如慎中才者權貴人欲其一見而慎中固不肯往曰吾寧失館職不敢失身乃改吏部慎中在吏部以才高事事得與謀少宰霍渭厓嘗稱之于衆中已進驗封郎中會忌之者短于羅峯張相國因以覆方士張衍慶請封事謫判常州慎中在郡能革吏弊得民心巡按御史郭宗臯夙重其才譽揚之而

巡撫侯位待之不少假委署江陰縣縣多大族多不法慎中不以遷客少偃蹇至則延見父老舉廢事除積害怙勢不悛者首置之法一縣肅然尋陞戶部主事再陞禮部員外俱留都令曹因得益肆力于問學嘗與龍溪王畿討論陽明先生之遺說而精心求之夙好古漢以下著作無取焉至是始讀宋儒之書而喜之尤喜曾王歐三氏文卽眉山兄弟猶以爲過于豪而失之放矣以此自信乃取舊所爲文悉焚之製作一以曾王爲準丙申陞山東提學僉事慨然以古風教爲已任章程條約爲之一新時下寮叅謁曲膝

過恭乃痛爲禁革所試卷品藻彈射百無一失其高等士率以次得雋去東人至今思之未幾進江西叅議江西乃陽明先生過化地故老猶能道其遺事慎中尋陳跡發新議往來白鹿鷺湖間與雙江聶司馬東郭鄒司成念菴羅殿撰南野歐陽宗伯交遊講習學益進俄遷河南叅政抵任禁有司不許科擾章聖梓宮過河南供億繁多下吏有棄官遁者慎中身任其役寮吏咸仰賴之歲饑戶部王侍郎奉旨賑濟王檄慎中將事慎中爲親歷郡邑開倉發粟民獲更生王具以狀聞且薦當大用辛丑考察忽從中報罷偵

之乃權相夏怪其爲屬日不曲意奉承而竟坐以不  
謹慎中旣罷因約同罷涵江劉叅知遊淇水王屋大  
少二室及武當山相携而歸劉竟不從慎中因獨至  
淇上徜徉百泉蘇門之間訪學士崔後渠談數日而  
歸時年甫三十有三耳慎中少年英氣太露如太阿  
出匣知其難犯久之涵養深沉藏鋒斂鐔而世竟莫  
能用矣其爲文必反覆沈思意定而辭立就造語華  
瞻命意深遠片紙隻字得之者有如至寶閩士日以  
所業請正門牆幾不能容凡監司部使者行縣莫不  
造其廬講道問政居常念從仕之早不獲盡力于父



母之奉故其罷也葬父養母稍無遺憾又以爲國家承平日久民不知兵一旦變作東南海上逋逃是爲大患泉固濱海且與漳隣深爲可慮建州爲八閩上游乃卜居焉後倭患作一如所料將遊武夷築室九曲深處遂躡屩至衡湘登南嶽棲息天柱回雁芙蓉峒巘諸峯澄神反照爲長生久視之道復與八才子等一晤因母病遂已戊午夏賊自武榮入郡境市鎮居民扶老携幼驚逃山谷中有倡爲清野之說者督責入城愼中撫髀嘆曰是大失計清野乃北邊虜至急斂人畜使彼無所掠若內地惟在郊關外村落生

聚然後能成治耳今宜速令各鄉大姓盡還故居相  
度地利自相團結使盜至不得逞而後城內可恃以  
爲安耳後數年卒壽止五十一

蘇士潤

蘇士潤字惟德號誠齋晉江人九歲能屬文文多驚  
人語同郡王遵巖以文名一代試之大加稱許少治  
尚書獨得其解有不拘拘于蔡傳者嘉靖戊午舉省  
試第三人晉江用尚書擢魁者自潤始蓋又七年而  
成進士爲吉水令徵入爲江西道監察御史首疏請  
東宮講學又疏舉遺逸以備緩急又疏裁東粵撫臣

以蘇困語皆剴切中時弊已有旨取光祿銀三十萬  
兩備內供潤杭章諫阻謂江漢之水不足塞漏卮宜  
從罷語尤峻直旋按長蘆鹺政行小票法通商利民  
至今著爲令巡按順天首劾一州牧恃輿援乾沒官  
帑者貪墨吏聞而股栗中貴人義子憑城社張車騎  
橫行都中潤廉得其黨與盡置之法不少貸自是中  
貴斂手相戒後巡視京營簡戎器練卒伍更置債帥  
營臣有懷私詭言京軍驕懦不足恃欲召募客兵以  
衛根本謂北人性勁使恩威素布訓練以時自可易  
驕懦爲精悍若棄土著而募烏合徒靡養兵之費無

益實用議竟寢在臺七年時相張江陵居正嘗欲招至門下潤謝不應心憾之而張故與僚少師高新鄭拱有郅合權璫擠高以去諸爲高媼戚故吏門生相繼斥謫潤新鄭乙丑所舉士因出潤爲湖廣按察副使仍風銓司用考察京朝官謫潤全州侔踰年量移湖州司理久之晉四川夔州丞後先六七年廻翔州郡上官多以潤自恃從要近下遷不欲煩以吏事乃潤一意勤修職業撫恤民隱勸農課士孜孜不倦歲壬午江陵物朝政更新諸爲所斥謫者或起田間或援自下僚有不數歲驟至通顯者而潤適以夔守缺

入覲如京師諸朝賢諗潤以直道久抑共推轂潤蓋不久超遷有日矣入都疾作卒

周天佐

周天佐字宇弼號磧山晉江人登嘉靖乙未進士授戶部廣東司主事辛丑年春楊爵以監察御史上封事大略謂雪雨不可爲祥瑞而頌之權奸不可爲忠信而邇之土木之工不可不止朝講之禮不可不修邪說之妨政害治者不可不斥讜言之益國與民者不可不聽初五日械繫下獄十三日夜復蒙笞且備極拷掠人悚懼謂爵必死不可救延兩月餘夏四月

初九日 九廟災 天子詔百官使言時政闕失天  
佐應詔上疏其略曰 陛下示人以言未若示人以  
政求言之切乃示人以言耳而御史楊爵之獄未釋  
是未示人以政也臣聞詔書且下意曠蕩之恩必首  
及楊爵今復不蒙恩宥臣展轉思之心實未安況明  
旨旣許條陳苟有所見寧忍終默國家置言官以言  
爲職楊爵所言之事豈逃睿見惟以過直犯怒誠可  
矜察而爵今在獄中已經數月且 聖怒之下一則  
曰小人一則曰囚犯以盡言極諫爲小人則爲緘默  
逢迎之君子不難也以奉直納忠爲囚犯又孰不能

爲容悅寡過之臣哉言行君子之所以動天地也人君一喜一怒上帝臨之 陛下試一思焉其所以怒爵而罪之者果合於天心否耶萬一爵先朝露而殞是使諍臣飲恨直士寒心爵一身之利害不足深惜而所關係 聖德之損益不細也臣願察爵之疏原爵之心特賜釋放仍乞明示嘉納不吝旌爵之忠謹以風天下之直則 聖德如天地之廣如日月之明由此而天意不回未之有也疏上有詔周天佐答六十下鎮撫司獄牢絕其飲食三日死題請出屍未驗屍時天晴日燄俄而雲靄橫空震雷微雨屍旣出雷

已天佐妻某氏候於門外見屍出以頭觸地幾死柩  
寘寺無不悲痛民有張弼者祭於柩前而哭之人曰  
子與舊相識乎曰否吾傷公以忠諫而死是以痛之  
深歸葬於閩中

### 楊逢春

楊逢春字仁甫同安人己丑進士授仁和縣令父喪  
未至官服除補崑山徵入授南京道御史出爲廣東  
按察司僉事母喪去職起復僉事爲四川按察司擢  
河南布政司叅議積資二十四年始爲雲南按察司  
副使未至卒年五十六居官竭心奉職崑山稱富縣



前令多以富自沒諸獻遺權力一切罷之其政寬民  
急吏賦籍獄牒胥吏不得竄手戶受賦重輕獄當決  
縱榜示出無不愜服不復求吏知權不在左右也撫  
按異意條教難遵春據理疏正江南北諸郡邑以歲  
時餽畱臺爲常春入臺餽不敢至曰是嘗爲崑山盡  
罷諸獻遺者不可溷也巡視江南北倉汰黜庸貪風  
采振竦在廣東分巡嶺南兼有兵戎之寄法弛日久  
將玩卒惰賊白日剽通道行旅梗塞春首舉綱維責  
郡縣以修政息民之要然後易置將領選卒訓練指  
授方略自是賊發輒得在蜀領鹽書專以鹽屯爲職

號煩劇春綜刷成額按籍考要年侵月虧瞭然可見  
課入日進時叙州戎縣都蠻叛殺掠吏民長寧戎珙  
一路邊無居人監司相顧莫肯發口春獨抗言且設  
禦取之策撫按謀委春春至益用耳目知蠻政爲不  
靖由屢撫養其驕桀之性非盡勦之後益不可爲度  
險阨分兵四路約期進勦春復計蠻素以撫徃我因  
而誘之陽撫其四鄉而以勦二鄉爲師名果得四鄉  
最桀者四十人以來盡殲之用是兵入有功俘斬千  
計湖廣分部潭邵之間戶多亡逃客戶据其田逋稅  
猶責主戶之存者故亡益多而逋不可校春爲法使

稅常附田以行田與稅不得相失卒於湖南民走哭相踵不絕

蔡貴易

蔡貴易字爾通號肖兼同安人父宗德號兼峯官台州別駕既以補官卒京邸母洪辛勤教成甲子舉鄉試戊辰第進士授揚州江都令洪卒服闋補浙崇德令崇德夾諸壯縣貴游結轍相望易以凝靜澹泊從事諸貴游無所加初至諸里甲以供應器物進甚腆易却曰吾起家措大一官如寄耳麾而退蔡邑民故苦差徭強有力者爭倚豪右爲藪不得差而易著畫

一法貧富適均民至今便之邑有大盜聚衆倡亂聲  
息洶洶諸使者欲兵之易曰察諸亂民皆脇之而行  
者亂非其本志此可折箠使耳用計擒其渠魁餘黨  
盡散全活甚衆晉南戶部主事管京倉以言者鐫一  
秩不補竟飄然而歸

郭楠

郭楠字世重晉江人正德九年進士由浦江知縣選  
貴州道御史嘉靖元年巡按順天議大禮詔賜廷杖  
罷歸六年起補吉水縣教諭累陞南康知府疏乞致  
仕以歸

丘養浩

丘養浩字以義晉江人正德十六年進士由餘姚知縣選授浙江道御史侃直不避疏斥權倖當塗擠之謫永平府推官尋復職巡視兩關督學南畿所在咸舉其職陞南大理寺丞累陞右僉都巡撫四川江西一時才望重於朝野未幾疏致仕而歸

李源

李源字士達號竹坡晉江人乙丑進士奉使廣東督發稽畱諸賦故事藩司以使事至者贈遺至百餘金而使者以藩司官尊逡巡不敢卻源一無所取藩司

購陳白沙字書四幅爲贖拜而受之使還除戶部主  
政差監臨清倉倉故置中貴一人董視之往與諸吏  
徒甲保乾沒爲奸利事憚源嚴恪治酒饌爲好冀以  
娛源當席舉杯沾唇而已中貴人斂手不敢恣者終  
一歲恚恨無所發則構趙副使侵撓倉事擾吏徒源  
疏其事以聞并劾中貴人罪狀事下戶部尚書孫公  
九峰歎爲得職每舉其官氏稱于曹中以勵屬員久  
之逆瑾竊權脩前憾遣轉餉遼左故縮其期欲陰以  
中之時天寒雪深數尺晝夜行雪中二百里竣其事  
以報瑾不能加也然常恐其禍及託以終養竟疏請

得歸是時瑾毒尚未斂 孝宗之遺澤尚存士大夫  
習乎晏熙高重不樂去職故于其歸也人咸咨歎以  
爲難源歸而母正患脾善怒寡歡笑乃制爲軟輿自  
與莊獲人舁之游嬉室中素有足疾蹙蹙然行也女  
侍爭走代之曰非爲乏使欲以用勞爲小孝耳且吾  
自勝之不爲苦也後瑾敗連以原官起用不赴又以  
南京文選郎就家起之亦不赴久之遷拜尚寶司少  
卿適丁外艱衰經未除而一疾不能起矣居以文史  
自娛宅近市廛庭戶蕭寂門無雜賓病足不喜出遊  
兀然一室焚香展卷正襟而坐俯仰千古之上平生

不御絲竹與人談有及物價市利羸縮低昂之說卽  
口塞似不能言至于陳說理道揚摧風雅亶亶有韻  
致聽者灑然忘倦爲文雄偉奧健其所獨得每斲破  
規矩自爲方負故銘幽記遠之文著述獨廣郡邑大  
夫欽慕德履承風致敬旬月必一造其廬然終不以  
他事相溷也起家爲進士凡三十六年有田百畝宅  
一區皆先人所遺後宅燬于火久不能興竄伏草莽  
瓦礫而寓其孥於戚里郡侯王公士俊蹙然嘆曰及  
吾爲守而使賢者無以庇其身吾之愧也議損貲助  
之于是僅成堂數楹而房寢庖廐竟不能具歿之日



無以爲殮稱貸于人始克成禮鬻田而葬諸子常不免于饑何其貧也抑無愧于古之節廉純孝矣

蘇志仁

蘇志仁字道先泉州人宋子頌之裔也生而氣宇清瑩穎敏絕倫幼偕羣兒遊里社中或言社中有鬼祟者羣兒驚走屹不爲動或怪問之曰鬼之於幽猶人之於明也何畏乎識者器之嘉靖甲辰成進士除池州府推官爲司理者多以搏擊爲能而獨持之以寬當庭讞時每從容陳說理道喻以至情恒多感泣搏額願罷去者適寧國缺守憲臣檄之署篆至則一意

鎮靜休養有加時有僞爲楚王世子東游者所至張  
赫抵寧拒不與見也潛使人言於王曰 祖制王者  
非君命無出境大夫不越鄉而交今大王世子不厭  
風露而徧臨四境惟王圖之王報曰僞也寡人子安  
得爲此乃擒而送之楚當道壯其膽智秩滿徵拜銓  
司歷陞文選員外郎久之因與李司封論事尚書前  
過訐直尚書怒竟坐降級補外得運判兩浙尋移興  
化同知轉江西按察僉事未至以疾卒于家志仁於  
書無所不讀而尤精于天文律曆之學下至金石彝  
鼎之文山川草木蟲魚之細靡不畢究所著有抱拙

堂稿及日紀存疑諸書類多遺世獨立之意而實根極理道歸其本於正故其文類皆可傳者

詹寅

詹寅字敬之泉州人生而穎異秀拔少卽具有成人之志其讀書務尋大義不屑屑爲經生之訓詁嘗私識其語于書舍曰讀聖賢書須繪出忠肝義膽友今古士要煉就鐵骨剛腸識者已知異日定以身負天下之重任矣久之成進士選授行人會武宗巡幸無度權宦江彬錢寧等竊叢神以爲祟假神虎以冒威所過無不荼毒者將北巡戒行有日各部及翰林

院具疏列名詣闕下伏畱甚懇上震怒罰跪門五日已而行人司繼之大理司繼之上益怒繼疏者盡褫其衣冠梏械手足下于獄命杖于獄中越五日又杖之闕下時死者七人而寅其一焉血肉淋漓棺衾不給凡見聞者靡不哽咽慘裂淚淫淫被于頰也時長安同志者共相賻助始克歸葬而妻子瑣尾不堪之狀極矣至嘉靖初元錄贈死事言官乃得蒙恩贈監察御史賜之祭錄一子入太學後爲光祿寺丞

陳讓

陳讓字原禮晉江縣人嘉靖間進士由紹興推官選  
浙江道御史以建言罷職疏薦復起御史尋建言罷  
歸天下靡不高其直歷久挫而不少降也隆慶元年  
詔贈光祿少卿

黃 馴

黃馴字珍夫安溪人爲邑弟子時每抵掌顧同舍生  
丈夫一日立玉陛前挾腎腸與人主爭萬世大計安  
能局促效轅下駒爲舉鄉薦久困公車最後謁選登  
溫州丞馴生平於進退取予析義至秋毫曰毋以纖  
微自恕也其丞溫州先後六歲而車門絕苞苴丞職

在戎政則日夜繕城郭清什伍修戰艦嘗慨然以爲  
憂曰賊眈眈吾溫柰何以烏令衆當之則又慷慨自  
矢曰丈夫卽死死職耳且吾髮種種生詎幾而愛之  
吾腹有丹者寸在蓋嘗書之楣間以識云又三年倭  
大舉犯溫兵使者檄馴出逆之人或謂嬰城易堅耳  
曰四郭外非吾民也耶而以委虜速逆之當是時溫  
軍分而三馴所將獨中軍其二軍帥皆乳袴子一軍  
軍壘石一軍軍鐵場以爲後援馴軍前薄於賊勁弩  
巨礮雷發賊稍稍辟易僅能成軍而賊陰分其衆爲  
二一從上流掩壘石一從下流掩鐵場其帥皆奔其

軍以走賊合而尾之馴軍腹背受敵遂大潰馴爲賊  
所得坐榕樹下而脅之降叱曰世寧有降黃大夫哉  
賊復好謂我歸大夫予我千金嫚罵曰生黃大夫不  
一金值也賊怒裸而寸斬之後賊退其婦林宜人行  
購屍已靡覓之不獲與其嗣子文燁具衣冠招魂葬  
于邑之沿江里白沙丘朝廷憫其忠特贈浙江布政  
司右參議錄一子太學下有司建專祠復祀於名宦

詹仰庇

詹仰庇字汝欽安溪人嘉靖間進士由南海知縣選  
授御史建言 廷杖罷爲民萬曆元年起陞叅議累

刑部右侍郎疏請致仕以歸

蕭騰鳳

蕭騰鳳晉江人隆慶戊辰進士初受南海令當巨寇  
曾一本煽亂之後邑里蕭條添設撫臣增兵置餉百  
務劬勩而督鎮叅隨客兵以千計皆雜處省城恣睢  
爲梗騰鳳明而能斷經畫調劑皆有方上下稱便催  
科則耗餘不入聽訟則兩造得情人心悅服獨以同  
鄉人爲郡守坐事註累遂左遷郡丞去衆共惜之後  
歷官至運使卒有才名善書黃體

李廷機



李廷機字爾張號九我晉江人幼稟氣薄就塾後猶  
夜啼筋浮睛露鄉父老謂非壽相父母亦憂之然沉  
靜寡言永日不思睡十一歲從黃默堂先生一日以  
狀元宰相命題破曰名魁天下之選身近天子之光  
先生喜甚命同學北面揖之蓋是時已能誦詩書禮  
記三經矣戊午以儒士應試補郡庠生辛酉倭亂鄉  
試後喪父癸亥喪母因取蓼莪之章號九我丁卯蔡  
見麓先生督學試高等補廩是年 穆宗皇帝登極  
戊辰選恩貢己巳卒業太學大司成餘姚孫公少司  
成同州馬文莊公咸以遠大器之庚午舉順天鄉試

第一自念一領測書輒事干謁爲生計古人謂餓死  
事極小失節事極大豈澹臺子羽不可爲耶因家永  
春深山中往居焉山中米賤蔬笋不鬻而有但不能  
具肉陋室蕭然不蔽風雨一友人經過憐而謂曰郡  
中儘可度日何自苦乃爾笑而不答癸未蘇紫溪公  
以工部分考卷冠其房四明余相公新安許相公拔  
寘第一 殿試第二授翰林院編修丙戌殿試克掌  
卷官夏持節封趙藩過家置義田贍族人葺先塋塋  
族人友人不能塋者丁亥還朝授小內侍書戊子編  
纂六曹章奏己丑分考禮闈得陶望齡等二十二入

殿試仍克掌卷官管理 詔勅壬辰九月秩滿陞侍  
讀改右春坊右中允兼修撰管理清黃癸巳陞司經  
局洗馬仍兼修撰掌局事甲午 皇長子出閣克侍  
班官改右諭德掌坊事秋典應天試還克正史纂修  
官時 豫教方勤秉燭講讀每四鼓呼長安門入寒  
暑風雨不輟乙未陞左庶子兼侍讀掌坊事經筵克  
講官秋典武試丙申陞祭酒謂今之教人者不近守  
高皇帝整齊嚴肅之法而輒遠引敷教在寬之文  
夫所謂寬者乃多方勞來輔翼欲其自得之謂豈以  
縱弛爲寬哉故教一以整齊嚴肅爲主拜興有節課

講有程差撥必公曠壓不貸而又以膳饌之餘葺文  
廟垣屋修補供具祭器葺官號房射圃又於圃中隙  
地植槐柳桃李梅杏數百株丁酉陞少詹事兼侍讀  
學士充正史副總裁六月陞南京吏部右侍郎署部  
事主京察公忠詳慎事事不忽攝戶工部盡革闔京  
舖行立水兌八規刊糧解單以杜橫索成山伯壩官  
河養魚民苦水腐不可食克成山決之浙人李文政  
流寓南京以交結貽籍京人告御史筦城者置之法  
葺外羅城一百三十里歲歲省水衡萬餘金葺孝  
陵周垣五十里葺皇城直房公署廟祠牌坊橋梁飯

堂皆取諸節縮奇羨度置無用之貲未嘗動帑一緡  
三年給由改禮部左侍郎兼侍讀學士四疏辭不允  
有旨敦趣癸卯七月入京署部事是時歸德四明兩  
相公不協會楚事四明又與江夏左江夏訐四明遂  
成郤至江夏引疾去守旨楊村妖書起言官因借以  
傾歸德至逮江夏會訊獨以身翼護之時皦生光佐  
驗甚明已承伏衆猶不決曰此事不決縉紳荼毒矣  
于會稿職名下直署情真二字衆署情真者十之九  
稿進于上獄乃決當皦生光之已承伏也更嚴拷  
訊令供同謀主名又詔責會問官有朋友情深君臣

義薄之語諸人承望風指首鼠持兩端江夏危甚因約詞林四五公求救於四明而歸德之門無敢至者獨數往候之或語曰人皆集於苑爾獨集於枯勿顧也甲辰知貢舉充日講官署部四年立簡便之法以便宗藩飭殿試之規以閑進士定廷試之期以便歲貢行歲考革彙考以便孤寒革紙戶鋪行以便民剗屋以居官施衲衣以活凍丐一切公文查覈題覆投領轉發不越日而其大者莫如王府卽遠年枉抑有訴立查立定奪出示人得面盡無阻格停滯之難諸宗知其如此遂不賄求胥吏及中官費大省貧

宗便之在部常不欲遷恐所興革不能久故吏部擬  
推少宰力辭既滿六年疏南北治狀請加尚書疏辭  
山陰相公謂可加太子賓客曰侍讀學士不佳却要  
太子賓客耶山陰笑曰如公足以風末俗矣久之

上亦浸聞甲辰朝覲 上於禁中語左右曰此時京

官正忙惟趙世卿李廷機此兩人閒不與外吏接也

丙午得 旨褒以忠慎恭勤又劄諭內閣有 朕知

其清謹之語丁未 上特 命以禮部尚書兼東閣

大學士入閣辦事謝恩疏言人臣惟知有主苟可自

致於主者無不盡有益於主者無不爲不知有身不

知有家不知有交游往來不知有毀譽得喪必無一  
念不可與主知必無一事不可對主言以是內省有  
不可則止之訓在焉人教之進言建言急收拾人心  
曰天下事平平做去天下路慢慢行去要急却緩要  
好却不好要明白却不明白美必歸君入告之語必  
不外傳雅慕清淨畫一之理欲省議論明職掌母相  
軼越守令甲母動論官曰勤事論人曰躬行論大臣  
曰擔當論相道曰廓然大公物來順應曰行所無事  
論用人曰中材最多惟恕以用之至論邊事則曰不  
可爲問其故曰苞苴可絕虜請託可杜虜由今之道



無變今之俗而欲將勇兵強餉足不可得也既入閣  
四方書揭俱于長安門外投領無有至其私門者在  
事九月主張四川撤兵全活黔蜀生靈省餽運處撫  
安疆臣兄弟不至爲播州之續謂北地營田可聽民  
自營官勿預山東故有海道通遼可轉粟給軍南京  
鑄錢利厚可廣鑄北輸濟工折俸商人苦累可查正  
德初年牌甲法編銀傭役間以折色濟之會有煩言  
遂決意乞身自戊申四月後屢疏屢慰不出再遣鴻  
臚寺卿宣諭不出 命同官諭不出 聖節不出閣  
事不聞邸報不閱言者蠶湧不辯已酉冬移之真武

屬居焉人曰褻矣曰席藁也或曰荒涼曰固安之或  
曰子未可以去乎必去必待 命去耳暇中續成春  
秋日講考永樂迄隆慶實錄所載閣臣爲皇明閣史  
纂國朝名臣言行錄編宋賢事彙剛通鑑性理書著  
四書臆說家禮家訓仕蹟如于卷壬子二月返故邸  
上遣中使諭少俟過萬壽聖節疏請辭朝 上猶不  
欲去旬日之內遣中使諭畱者三遣鴻臚卿者二又  
浹旬乃辭朝 上乃允加太子太保予銀幣馳傳遣  
官護行恩數優渥而尚責中璫不邀畱怪其急去猶  
若不釋然者人以爲殊常之眷殆二十年來所未有

云平居言論動稱古人在詞林惟禮節事體咨前輩至行已居官則曰擇善而從可也秀才時館於何憲副小洛公家見公自道居官朝叅之勤心識之故仕宦三十年不敢以憚勞養安失禮怠事嘗言無故不朝叅公座律當笞君子懷刑烏可犯焉攝南工時有縉紳過謂公翰林官顧肯親俗事乎曰有俗人無俗事天下國事何言俗也居恒喜誦羔羊之詩而玩其序所謂節儉正直者以爲正直必出於節儉每語家人曰士大夫恥言治生然不可不治生夫治生非委瑣齷齪慳吝自封殖之謂不過節用耳翰苑坦途第

覺官之美而遷之驟未嘗以一差一缺囁嚅當道之前不能諛人亦不能毀人事可告人私書可示人或言人過失曰未必然或告以某人怪子曰渠與余善不怪平生操無心之道以遊於世人亦多亮之者嘗言士大夫壯而行老而休乘流則逝遇坎則止又云時非漢室才謝孔明何必死而後已哉故出處之際不謀於人隨時據理行其心之所安而已平日兢兢於所投狀揭未嘗經目曰則有司存交際辭受一介必嚴有問者應曰上不敢負 聖主之知下不欲改平生之節也歸之明日卽爲亡弟襄葬飭先墳治首

丘築筍江舊廬營菴亭童子時讀書處也又修朱文公祠及主梅溪真西山與衛民祠產業寡而授受明賦無愆期其產猶在他戶代輸來索者應之不踰晷無山蕩海蕩軍田官田寺田寺房管社管渡之事於人無爭於官府無求事省心間眠食外無別念常言民之質矣日用飲食穿衣喫飯夜眠曉起便是道便是仙佛哀人窮急于賙見義急于舉有義舉則急于助未嘗以無自解也以疾卒祭葬贈謚咸如制而加渥焉

補遺

謝璉

謝璉安溪人宣德丁未探花穎異絕人子史百家過目輒成誦除翰林編脩纂述數千百言務在不詭俗好嘗言史官之得失係天下之是非一時之褒貶關萬世之榮辱時有權貴人干以私璉廷諍之不爲諱嘗脩宣宗實錄大明會典聖鑒日曆諸書會災異屢見璉請出官人又請赦諸無辜除璉坐法遷侍講進經筵上御彛倫殿命坐講經俯聽甚悅嘗舉政要一十五事名曰直言治平策反覆萬餘言皆裨實用策上天子稱異次第舉行陞戶部侍郎會太

學士高穀同年友也意欲推轂璉謝絕之竟未嘗以尺素通問端嚴正直最有大臣風 上方柄用不幸卒于官

### 陳道基

陳道基字以忠晉江人進士嘉靖二十九年知嘉善性簡易不立崖岸與人語煦煦惟恐傷之屏苛剔煩御下以寬三年未嘗入一重辟囹圄幾空然又謂巨奸不去善良之蠹也初下車悉籍里中惡少嚴刑苛校重困辱之仍書名申明亭有犯必懲是以刑寬而政不弛故事日輪里長一人供役煩簡不均偶值多

事所費不貲因酌一年公用之數通融言切財銀于庫細戶有逋負鬻妻孥以償者輒爲代補間有窮民困迫無聊入縣請借公用餘銀以自活道基隨數給之民亦無一負者上下相信惟如一家又擇士之有志者聯文會躬爲校閱梓其文以傳召去民泣陳亦泣至今邑中村農塾婦皆知有陳侯而祠祀之

### 蘇濬

蘇濬號紫谿晉江人發解癸酉丁丑中會試授南刑部主事丁憂復除工部選禮部員外陞浙江提學僉事管乙酉戊子兩科一時甄收率多名士而浙之文



體亦翕然不變己丑陞陝西叅議廣西副使癸巳陞  
本省叅政又陞貴州按察使准致仕濬以能文爲海  
內重又以知文爲海內重癸未榜首李廷機其首取  
士也而丁未榜首施鳳來亦其首校之諸生中者他  
所識拔多取魁元槩難枚舉身歿之後地方採公論  
與蔡虛齋並祀則又不直以文章顯也

### 楊道賓

楊道賓號荆岩晉江人萬曆丙戌一甲第二名授編  
脩歷官禮部右侍郎尋轉左兼侍讀學士未幾卒于  
官道賓丁酉典試浙江庚子典試順天一時甄收多

知名士文體亦爲一變其人大雅不群素留心經濟而不急急于功名屹然負公輔之望惜未竟其施云